

欽  
定  
全  
唐  
文

欽定全唐文卷四百九十五目錄

權德輿 十三

兩漢辯亡論

無爲先生讚

二疏讚

祕閣五絕圖賀監草書讚

畫西方變讚

畫釋迦如來讚 并序

繡阿彌陀佛讚 并序

歲星居心讚

并序

興唐觀新鐘銘

并序

幾銘

世德銘

釋疑

志過

荅客問

荅問三篇

醉說

放言

欽定全唐文卷四百九十五

權德輿 十三

兩漢辯亡論

言兩漢所以亡者皆曰莽卓予以爲莽卓篡逆汙神器以亂齊民自賈夷滅天下耳目顯然聞知靜徵厥初則亡西京者張禹亡東京者胡廣皆以假道儒術得伸其邪心徼一時大名致位公輔詞氣所發損益繫之而多方善柔保位持祿或陷時君以滋厲階或附凶沴以結禍胎故其蕩覆之機篡奪之兆皆指導之馴致之雖年紀相遠猶手授

頤指之然也其爲賊害豈直莽卓之比乎禹以經術爲帝師身備漢相特見尊信當主臣之重極儒者之貴永始元延之間天地之眚屢見言事者皆譏切王氏顓政時成帝亦悔懼天變而未有以決駕至禹第辟左右以問之須其一言以爲律度爲禹計者亦須陳大易堅冰之誡誦小雅十月之刺乘其嚮納痛言得失反以罕言命不語怪爲詞致成帝不疑之心授王氏寢盛之勢上下恬然晦忽亡國儻帝慮不至是猶當開陳切劘面折廷辯矧當就第燕閒之際虛懷訪決之時方且視小男於牀下官子壻於近郡

款款然用家人匹夫爲心以身圖安不恤國患致使羣盜  
弄權迭執魁柄禍稔毒流至於新都不可遏也斯可憤也  
逮至東都順桓之間國統三絕胡廣以鉅儒柄用位極上  
台初梁冀席外戚之重貪戾當國旣鳩質帝議立嗣君公  
卿大臣皆以清河王蒜年長有德屬最尊親可以靖人亦  
旣定策冀乃憚其明哲且不利長君私於蠡吾獨異羣議  
爲廣議者亦當中立如石介然不回率趙戒之徒同李杜  
所守然後三事百工正詞於朝雖冀之暴恣豈能一旦盡  
誅漢廷羣公邪反徇一息之安首鼠畏懦竟使清河徒廢

蠡吾爲梗邦家陵夷漢道日蹙結黨錮之獄成闢寺之禍  
禍亂循環以至董卓赫赫漢室化爲當塗蓋棟橈鼎折之  
所由來久矣彼梅福以孤遠上疏張綱以卑秩埋輪獨何  
人哉而不是思也噫嘻就利違害榮通醜窮大凡有生之  
常性也暨乎手持政柄體國存亡則謹之於初決之於始  
以導善氣以遏亂原若禍胎旣萌則死而後已白刃可蹈  
鴻毛斯輕奈何禹廣於完安之時則務小忠而立細行數  
數然獻吉筮於露蓍沮立後於探籌及夫安危之際邦家  
之大則甘心結舌陰拱觀變豈止然也方又熾燄燄以燎



原決湯湯以襄陵投天下於煙煨擠萬民於昏墊百代之  
下無所指名雖史贊粗言而不究論本末且出不越境書  
弑君之惡言僞而辯有兩觀之誅若當春秋之時明禹廣  
之罪作誠來世可勝紀乎向若西京抑損王氏尊君卑臣  
則庶乎無哀平之壞東京登庸清河主明臣忠則庶乎無  
靈獻之亂大漢之祚未易知也或以國之興亡皆有陰陽  
之數非人謀能亢則但取瞽矇者而相之立土木偶而尊  
之被以章組列於廊廟斯可矣何堯舜之或咨或吁殷周  
之或夢或卜憂勤日昃之若是然後爲理耶子因肄古史

且嗜春秋褒貶之學心所憤激故辨其所以然

無爲先生讚

至人無感與化升降全而不形保而不蕩汎然順物付之  
自當苟乖於是無非溺喪保合浩淳先生其人德機不發  
鳥獸同羣稽首元關請滌蒙昏笑而謂予道不遠身支離  
而全以靜爲君滑之則散泊之則存天性者名木伐蘭薰  
與時卷舒中若浮雲華臭絲棼無撓而真勤而用斯至妙  
之門百昌皆化吾亦歸根動作天紀靜爲地文鳥行無章  
變化沄沄強名無爲以鏡心源

二疏讚

靜專動直惟乾之德酌用不窮君子中庸矯矯二疏知微  
知終功成不居父子清風天子賜金羣公出祖都門之美  
焯映千古優游衡門棲息化源日飲醇耐心閒道尊人或  
言利利令智昏清行素風可貽子孫萬物營營吉凶相生  
環中之樞泊然遺形中林寂寥幽蘭自榮雖有繒繳不羈  
冥冥知止不殆古先炯戒賢哉大夫終始無悔

祕閣五絕圖賀監草書讚

季真造適揮翰睨壁酒仙逸態草聖絕跡興涵雲海詞韻

金石傳於祕邱永永無斁

畫西方變讚

惟西方有極樂國以首楞嚴爲理其應溥其用神大抵攝  
萬緣羣動會於虛寂其次則感通信誓爲釐爲福局於世  
論者多置爲他方之教惟孝子信士仰爲冥助則像設之  
綵繪之用申罔極之報今茲西方變卽故戶部員外郎贈  
給事中范公之孤曰傳正傳質奉爲先妣博陵崔夫人旣  
練所畫也惟夫人以淑明柔順光配戶部自畫哭之後訓  
二孤之暇每讀誦大乘微言密詣精理今傳正等又能將

順先旨發於孝思於精廬素壁合朱綠金翠之飾天人法  
相靡不嚴靜以夫人之福履孝子之至誠若乘念以游如  
經之旨當趺坐於芙蕖上品之中生滅流妄於是昭息予  
嘗心奉其教故得贊其所以然

畫釋迦如來讚

并序

釋迦大聖以無礙應身演一切法後之人跡文字以爲像  
設誠明以在中而福祉隨之伯舅武進縣丞府君守儒門  
言行之訓安貞下位其道未光貞元三年捐館舍太夫人  
從子於鍾陵承訃發哀茹終鮮之痛且痛不得當哭泣之

位躬卽遠之事期喪之禮禮有加等又曰悲哀鍾於情而  
不足以爲冥助也乃稽諸釋氏說以爲幽贊交感之際不  
相遠也是用徼福以作繪事煥以金碧穆然尊嚴瞻仰之  
際如至佛刹况孝悌通於神明聖功演乎無方小子德輿  
謹繫以贊

五色相宣兮聖質昭明福祥下照兮保佑冥冥

繡阿彌陀佛讚

并序

十二因緣之中生死循環憂悲蘊聚非天人大聖以利刃  
斷之慈航濟之則淪胥顛覆之不給矣惟阿彌陀佛化行

西方其號極樂有生之乘念感化之由

一作則由於斯

今茲功德

者清信女士隴西李氏爲亡夫襄陵尉滎陽鄭君再期之爲也女士歸鄭一周星而孀凡事舅姑以孝從娣姒以敬佐夫以義拊下以仁隱約終窶至於晝哭衛風碩人柏舟之詩實兼痛焉初鄭君旅人於晉因以筮仕成命甫行祿未及而大病女士方侍姑於吳承訃加痛宏誓徼福薦於冥冥紉鍼綴縷叶用五采青蓮白毫髣髴嚶呻彼二大士列侍左右睟容交光炳耀煌煌發於心成於手阿鞞跋致其遠乎哉鄭固善士妻又吾伯舅之女子子也得周知之

金史卷之五  
因以讚曰

西方大聖乘念則至寫彼相好導茲志氣冥助無方以成  
鄭志

歲星居心讚

并序

興元紀號皇上宅位六祀七政貞明於上七教敷聞於下  
其有不迪不吉不庭不若之徒皆欣然而和晻然而化春  
三月司天氏奏歲星居心宿五度其色黃明潤大光祥帝  
位積五十餘日詔下有司頒示中外故臣得而言之以形  
歌頌臣謹按歲星五帝爲蒼五行爲木五常爲仁五事爲



貌天意若曰時以至仁爲理覆露萬人洽浹生類協夫五行五事之用則發於星緯形於占應陰陽大化昭報成功元符幽贊其昭昭如是禮運之論聖人曰以日星爲紀以四時爲柄洪範之敘皇極曰斂時五福用敷錫厥庶人發於人格於天天人交感合若符節其年秋平河中之寇葬其遺骸復其世紀班淮右之師用宏文告用去武備此二帝三代所以恢令名也於是一統類以昭德明法制以塞違薦禮百神賓懷獷俗嘉瑞美祥紛委狎至置之而不有哲人端士連茹播職求之如已失然後端拱於穆清怡神

於靜冥驅一代爲純誠接萬靈於明庭斯又登邁邃古光  
昭聞見巍乎紹天統物之盛者也微臣伏於草茅之下沐  
浴仁聖敢獻歲星居心讚一章以備周詩由庚由儀之闕  
讚曰

皇矣上帝降鑒下人后王承之制作禮文又用清明家尚  
孝仁人無癘疵俗以阜蕃敷佑四方發爲天祥重華煌煌  
乃居明堂下煦仁澤上爲祥光肸鬯感通天人攸同乃發  
五事乃建大中君君臣臣德輝昭融保佑命之自天無窮  
微臣作歌敢備唐風

興唐觀新鐘銘 并序

聲爲陽所以發越金尚羽所以清徹故鳧氏工焉法器成焉元門揭焉與夫樂出虛鏗立號同其功用而信響受祉之說倍焉興唐觀新鐘者觀主道門威儀太清宮供奉郝尊師彝素之所創也是觀經構之初與舊鐘俱當開元甲戌距今七十有七歲嗟缺毀棄法音不嗣久矣師有環中大辨爲道流龜龍循其照觀其妙法自然無爲而無不爲所以恢元功宏願力誠修而物應言發而響會上士仁人展其助飛廉回祿理其具精乎六齊合以萬數以心齊以

金史卷之三  
神遇橐地籟騰天光無害金無耗氣不窳不樛不石不播  
於是登簾在懸希聲殷然小大隨叩昏昕警眾周六虛而  
洞三界拔九幽而清五苦皇都人士游者萃者感於耳和  
於心躁者靜者懸解師之善利利物可勝道哉古者林鐘  
景鐘皆銘其功儒氏之典也推類以鏤文字師之心也銘  
曰  
其動也懸而天其用也虛而圓雷大音兮集羣僊福元后  
兮斯億年鏗劄響亮鴻都前上入冥兮下徹泉然後春容  
銷散兮返萬物於自然

幾銘

太和熙熙酌而用之旁魄變化皆生乎幾上合乾道萬物  
陰隲下爲人紀百工咸秩游泳虛無合體渾區乃卷乃舒  
與羣有居沖用爲工方寸爲鑪周行不殆造物可侔一以  
制動寡以理眾或行其道或藏其用盤桓利貞得時大行  
燮贊裁成粲然文明舒亘八極藏之無形山川出雲元氣  
冥冥故曰知幾其神孔父周文去聖遠矣時無其人見幾  
而作造形斯悟遽生可卷顏子殆庶物至知之節宣好惡  
無愆五事無汨百度靜之如淵運之如環得喪糾纏相望

其閒不見其朕莫知其然審而用之吾道常全

世德銘

肅肅我祖元鳥自天天乙革夏武丁相賢手文命子開國  
於權輿荒南荆爪隤綿綿爰暨周衰征伐下顓凌暴紛紛  
遇楚而顛羸吞四方我邦用遷乃宅隴坻乃封甘泉漢魏  
之際德業相繼或仁或哲亦夷亦惠圖謀歲蕤十有三世  
伊川其戎晉化爲東九州輻裂苻有關中明明安邱濡跡  
匪躬二紀清夷明謨之功元魏以降苒茅繼封宜昌鄜城  
仍世儀同洸洸平涼策勲於隋乃破公祐尅其枚迴運偶

聖時土田載開仗節建旄自東徂西才子六人承家鍾慶  
百里同休南宮並命自時厥後德輝愈盛不享大官世名  
文行我曾王父弱歲觀光聲軼太學名登奉常偉節三虎  
聯華並芳翰苑春生士林鳳翔迨至王父保和居易人文  
獨步天爵自貴展禽下位賈生不試至今德聲尚聳清議  
郁郁世範先子承之大節明義人倫宗師行極忠孝道冥  
希夷卷舒無方焯燿當時曰予無狀齒歲而孤不知義方  
藐爾蠢愚亦旣羈紲甫習詩書以直爲師與時浸疎琅琅  
清風傲皁士則及茲頑童是玷是辱聿修之誠大懼不克

夙夜以思敢銘世德

釋疑

記曰君子居易以俟命語曰君子坦蕩蕩此蓋視履考祥而不憂不懼也易曰思患而豫防之語曰季文子三思而後行此又戒慎若厲之義也言豈一端而已哉亦各有所當在明者審之而已或不能深推本末而疑吾自若則舟有溺騎有墜寢有魘飲有醉食有饁行有魘其甚則皆可致斃無非危機其可以盡廢此而如土偶木寓耶不然則憂可既乎憂可既乎



邪志迭相薦譽號爲通人亦有務名如循實求進如知退  
雖近習不得其誠巧厯不知其數鄉原邑聚變化周流取  
美名貴仕如轉圜反掌世教無主蕩然隨之豈曰盡然蓋  
寡不勝衆其甚也滅天下之公是瞽天下之好惡鉛刀蟬  
翼爲銛爲重於是民反德爲亂天反時爲災愆陽伏陰山  
童澤涸皆此物也及夫中外蕩析邦家艱晚則相傳曰殆  
天數乎非人力所及也生極顯尊死有誅謚爲惡甚矣而  
譏議不失故天下之人父教其子兄諭其弟奔走寘力以  
不能爲恥而欲望理多亂寡庸可得乎接輿申徒狄之徒

佯狂而不復者皆惡是也蓋在爲國者澄其源流以灑士  
行示三代之直道頒七教於國風取如是之流投禦魑魅  
示不復用則時風厚而天下理矣客曰請書所聞以爲子  
孫藏

答問三篇

或問性命答曰天之於人也賦其命則有窮有通有壽有  
夭賦其性則有枉有直有仁有鄙性之不可移猶命之不  
可移使仁而直者通而壽天下之理理也窮而夭則反是  
鄙而枉者窮而夭天下亦理理也通而壽則反是其所繫

者在天不在人在彼不在此吾何言哉吾何言哉

或問富貴荅曰君子之所樂也問曰君子豈樂是而厭窮約耶荅曰先師嘗言之矣樂以其道處之者也不以其道則市井狡僇者皆能得之矣君子之所樂者非樂其身富且貴而已樂爲仁由已而推其道於天下也

或問出處荅曰出有二道在所執焉爾行道耶趨時耶

關一

字居易絜矩坦夷中正則道在已而時不可必也就利爲害推移俯仰則時在已道不可必也若道與時叶發紆光大則易之上下交泰詩之南山有臺書之咸有一德三說

命是也斯蓋從古之所難也古之處者所以晦其明藏其用窮棲於嵌巖之下與鳥獸草木之爲伍者誠角其利病而愛其身愛其道也豈得已之爲耶

### 醉說

子旣醉客有問文者漬筆以應之云嘗聞於師曰尚氣尚理有簡有通能者得之以是不能者失之亦以是四者皆得之於全然則得之矣失於全則鼓氣者類於怒矣言理者傷於懦矣或狃狃而呀口跼跼以墮水好簡者則瑣碎以譎怪或如識緯好通者則寬疎以浩蕩龐亂憔悴豈無

一曲之效固致遠之必泥苟未能朱絃大羹之遺音遺味  
則當鐘磬在懸牢醴列位何遽翫九索而航粃餌况顛命  
而傷氣六經之後班馬得其門其或慙如中郎放如漆園  
或道拔而峻深或坦夷而直溫固當漠然而神全然而天  
溫成四時寒暑位焉穆如三朝而文武森然酌古始而陋  
凡今備文質之彬彬善用常而爲雅善用故而爲新雖數  
字之不爲約雖彌卷而不爲繁貫通之以經術彌縫之以  
淵元其天機與懸解若巧鼻而斲輪豈止文也以宏諸立  
身不如是則非吾黨也又何足以辯云

放言

大凡此世皆妄作也又何足以滑吾真苟虛中以順外兮  
吾又不知夫萬物之汙汙爲細爲大爲利爲害循環出沒  
互相變態至人達觀萬殊一槩弊弊焉分得喪於毫釐之  
內貴乎其道可以富壽天下賤乎無纖芥之爲累者生乎  
順羣物而熙熙如春死乎智氣歸虛無以反吾真則何嚮  
而非適又惡用天性以勞神

欽定全唐文卷四百九十六目錄

新文藝出版社藏書

權德輿 十四

大唐湖南都團練觀察處置等使朝散大夫檢校  
左散騎常侍持節都督潭州諸軍事兼潭州刺  
史御史中丞雲騎尉賜紫金魚袋李公遺愛碑  
銘 并序

大唐銀青光祿大夫檢校司徒同中書門下平章  
事太清宮及度支諸道鹽鐵轉運等使崇文館  
大學士上柱國岐國公杜公淮南遺愛碑銘 并

序

唐故義武軍節度使營田易定等州觀察處置使

開府儀同三司檢校司空同中書門下平章事

范陽郡王贈太師貞武張公遺愛碑銘

并序

大唐四鎮北庭行軍兼涇原等州節度度支營田

等使開府儀同三司檢校尚書右僕射使持節

涇州諸軍事涇州刺史兼御史大夫上柱國南

川郡王劉公紀功碑銘

并序



欽定全唐文卷四百九十六

權德輿十四

大唐湖南都團練觀察處置等使朝散大夫檢校  
左散騎常侍持節都督潭州諸軍事兼潭州刺  
史御史中丞雲騎尉賜紫金魚袋李公遺愛碑

銘并序

皇帝在宥天下十九歲覆露元元東求官師六服羣辟辯  
章教化歲九月制詔湖南長帥中執法李公異爲江西申  
命小宗伯呂公謂爲之代於是循其功善跡其故實百城

之吏言於郡伍府之長款於軍鄉部僞舊華顛卬角一其  
音詞奔走理下請鏤金石以爲表式呂公以公之馨香可  
覆視而不可誣也衆之詠歎可論次而不可遏也悉以列  
上實蒙可報乃類其言而文之云善爲理者必因其俗而  
求所以便之因其便而思所以化之惠澤被而五教行財  
用足而百志成上下熙熙臻於洽平古之循吏公之報政  
皆是道也公字令叔趙郡贊皇人曾祖知讓皇河南府長  
水主簿祖承允皇任朝散大夫江州別駕考巖皇右武衛  
錄事參軍代名文行爲北州冠族公始以典學含章立於

清朝詳平憲令閑練程品秉直不回得時寔明能抗駁論  
輒還成命人之所難於公爲易惟天愛人惟聖法天欲其  
善利逮下也故詳試公以政事其初由殿中侍御史爲美  
源令由刑部員外郎爲萬年令由左司郎中爲常州刺史  
邦圻和寧京邑肅清居部考課爲諸侯表率是皆章章已  
然之功也貞元八年冬十二月由給事中至於是邦長沙  
九疑澤國回遠徵令頗繁物力或屈歲杪逋負夫家病之  
人未安於里落程不給於公上公乃嗇其經用代其賦輸  
厚施已責過於萬數得以贍助使之均安又以支郡地征

有繫軍實量力調穀減輕緡錢經始致用爲之倉庾時其發斂而歲無凶荒以封內饋饗道路風波轉漕沿洄僦載煩苦僝功度木爲之舟楫程其遠邇而師以足食以邑里湫隘之不宣也則闢其塗巷以利之以室廬苦蓋之不固也則教其陶瓦以易之講功慮事以建長利如此之備也稽先師之教以進儒術庠塾經明歲時計偕出入阡陌噢咻農里無告則加其餼發聞則弛其征鄉無不率教者修司馬之法以宏其事器用犀利賦輿輯睦拊循以誠少長有禮事親者調其供養被病者恤以醫藥士無不賈勇者

精力賦政以之鎮靜如此之至也唯公直而和肅而寬縝  
密而智溫良而能斷秉心砥平莅事風生法制定於上奇  
衰絕於下故下車而安已日而孚期月而政成五年而增  
秩六年而進律德風下偃協氣旁達丕休乎哉前後與公  
交代於是邦者皆以密侍右職來施美化裕茲一方其天  
意乎昔弱翁次公率以郡國理行入當柄用然則三湘九  
江之地豈得顓受公之賜耶太師陳詩觀風諸侯言時計  
功皆前志也暨魯大夫請於周而史克有駟駟之什今潭  
人以德輿再拜奉命書獲知懿績俾章善頌永篆樂石銘

曰

帝命元侯允釐方州郁郁李公此焉輯柔洞庭南匯熊湘  
經介下爲度制上以藩衛彤襜淑旂四牡有輝授茲介圭  
輟自黃扉吏絕私回俗無尤違保惠教順樂郊焉依乃倉  
乃庾克敏農穡乃剡乃剡利涉不息乃端徑術乃導埏埴  
政成事時節費寬力七郡清靜百嘉蕃殖誠以愛人滋於  
樹德今則去我鄰邦是式祝公伊何上贊皇極報公伊何  
惟金石刻載茲聲詩永慰南國

大唐銀青光祿大夫檢校司徒同中書門下平章

事太清宮及度支諸道鹽鐵轉運等使崇文館  
大學士上柱國岐國公杜公淮南遺愛碑銘 并  
序

通天下之志者在大君元臣之感會而已成天下之務者  
在知人安人之教化而已孝文御寓貞元十九祀統燭羣  
生德侔往初建用皇極澤流萬國淮南節度觀察使左僕  
射相國杜公政成入覲迺三月壬子朔登拜司空秉鈞居  
中間一歲上皇承末命越八月皇帝受神器弼亮三聖謨  
明九功當冢宰總已之任護崇陵因山之制盡董經費以

頒地貢乃作司徒式和人則進封岐土命賜備厚均齊天下之政茂遂萬物之宜遵道宏化匪躬宣力中外之重必歸於公初公之入輔也制詔副節度使兵部尚書王公爲左僕射代居師帥州壤鄉部鰥孤幼艾蒙公之化也久感公之惠也深鬱陶詠歎願刻金石王公累章上請公輒牢讓中止至是復以邦人不可奪之誠達於聰明且用季孫行父請史克故事德輿得類其話言而鋪其馨香云公字君卿京兆杜陵人不書名尊大臣也清明廉直溫毅宏重易簡之道本於健順忠智之謀發爲事業慮善以動得



時大行其初筮仕州府交辟韋尚書元甫實爲已知始自掾吏累爲命介盈庭鬪辨積歲疑留者片言以聽斷含冤自誣具獄論殺者覆視而全活江介吏師以爲神明由殿中侍御史轉主客員外郎工部郎中再爲撫州刺史以御史中丞領容州刺史經畧使入爲金部度支二郎中復兼中丞超拜戶部侍郎出爲蘇州刺史屬受代者以憂闕換饒州刺史明年以御史大夫領廣州刺史嶺南節度觀察使徵爲尚書左丞復以御史大夫領陝府長史陝號都防禦觀察使歲在庚午以禮部尚書至於是邦禹貢淮海之

域職方東南之輿產金三品射利萬室控荆衡以沿泛通  
夷越之貨賄四會五達此爲咽頤初公之至也歲丁驕陽  
人有菜色於是息浮費以悅之蠲雜征以利之夫家之稅  
有冒沒者免其罪以購之廢居之豪有委積者盈其直以  
出之瀕海棄地焚芻填淤一夫之勤百畝可獲終古遺利  
沛然嘉生成於指顧得以蕃殖先是營部未葺囷倉未完  
介夫半寓於仁祠公聚或委於支郡公乃慮材用量事期  
輯中權規大壯百堵皆作三軍寧宇轅門言言夏屋耽耽  
可以張射侯可以容宴豆爰居爰處而武備修矣巨廩崇

構翬飛雲矗縮以板榦積如京坻得蓋藏之宜協出入之制多黍多稌而禮節行矣連營三十二積穀五十萬工以悅使人以樂成又潛雷陂以溉穡地醜引新渠匯於河流皆省工費而宏利澤俄授左揆竟參大政加徐泗濠等州節度使先皇帝在宥天下推恩彭城顧懷舊勞復命其嗣使得以州師建節而公以二郡進律惟公鎮定一方心平德和言仁必及人言智必及事生聚教訓勤身急病視闔境如棖關之內撫編人有父母之愛因其習俗而均安之識其慘舒而導利之仕六朝而時推元老踰二紀而再掌

邦賦揚美化於方志流淑聲於命書其牧臨川也地參閩  
蜚人本輕惰化彼游手敏於農功堅舊防而時其蓄泄當  
大旱而我有雲雨每歲徵令歸諸有司克變輸將之勤不  
虧公上之入因獲贏利悉調困窮其總司計也權重輕以  
平物力受比要以均財征厚生而不匱量入而有節當一  
人注意之重盡三接沃心之言宰司沮傷不得久處其鎮  
南海也服嶺阻深族類猜害塗巷陋陋黷埃接連忿懷相  
因鬱攸斯作公乃修伍列闢康莊禮俗以阜火災自息南  
金象齒航海貿遷悍將反覆遠夷愁擾吏困沓貪商久阻

絕公乃導其善利推以信誠萬船繼至百貨錯出邕部絕  
徼裔人自擅誘掖招徠以威以懷朱崖黎氏保險三代種  
落盤互數犯吏禁公麾偏師一舉而平獷俗率化原人得  
職其登左轄也紀律修明清萬事之本其理分陝也惠綏  
浹洽宏二南之化必宿其業而修其方崇庸大績其昭昭  
如是而又博極書術詳觀古今謀王體斷國論其言有章  
聽者皆竦作爲通典以究理道上下數千百年閒損益討  
論而折衷之佐王之業盡在是矣公之先在漢則建平敬  
侯有立宣之功在晉則當陽成侯決平吳之策忠力雋賢

寢明而昌以至曾祖諱行敏皇銀青光祿大夫荆益二州  
大都督府長史南陽郡公王父諱慤尚書右司員外郎麗  
正殿學士烈考諱希望歷鴻臚卿御史中丞再爲恒州刺  
史代鄆二州都督西河郡太守襄陽縣男贈尚書左僕射  
惟南陽德化茂於列藩惟右司文雅重於中臺惟僕射有  
文武器任克揚風績其督鄆州總節制留府數與虜确奮  
其威謀奪鹽泉吞河曲城便地置新軍剖符惠人理行第  
一以先大夫代德丕烈之若是公能聿修而宏大之憑厚  
貽慶爲不誣矣居鎮十三年願修覲謁拜章十上西向涕

淚上難其繼慰勉而已公以述職在於庇人納忠在於薦  
賢密疏請以王公爲代詔爲之貳暨公之至也由大司寇  
爲大司馬以副車戎袞伏謁和門禮容渥命寵耀藩服介  
圭得請丹轂載馳勳籍裨校乞留遮道初諭以溫顏終肅  
以軍法旣告令尹之政卒獲子牟之心詩曰布政優優百  
祿是適又曰神之聽之式穀以汝則岐公永享鮒臺如岡  
如陵不待瞽史而前知矣惟王公師長論道如公之位阜  
俗撫封如公之心且以斯人嚮慕三歲愈甚大懼公之功  
德寢而不章初撫人廣人皆鏤堅石以攄盛烈及茲而追

琢者三矣古所謂信讓以莅百姓則人之報禮重其在是乎銘曰

惟天惠人惟辟奉天利建元侯於藩於宣文武杜公端誠絜矩化洽陝服聿來茲土闢我烏鹵長我禾黍乃建營部乃新廩庾成師足食比屋安堵里閭熙熙衍沃膺膺十有三年慰安斯人雪泣抗章血誠上陳結戀明庭不私其身樹善交代如公之仁考祥視履宜錫蕃祉寅亮三朝是毗是倚密勿中樞矢其謀謨乃升司空亦作司徒九賦旣平五教式敷中外之重惟公是圖彼都人士飲公之德彼土



樂康繁公之力永言介福祝我岐國稽合聲詩於胥篆刻  
彼泉而實彼石而泐公之德耀永永無極

唐故義武軍節度使營田易定等州觀察處置使

開府儀同三司檢校司空同中書門下平章事

范陽郡王贈太師貞武張公遺愛碑銘

并序

維唐十二葉皇帝纂大統建大中始初清明敷佑下土稽  
四征六服之理閱先正宗臣之籍流慶斯復遺風可懷絲  
是博陵上谷列侯二千石元僚司武從事亞旅上其故府  
太師貞武公功德請銘於碑以示厥後乃詔小司徒臣德

輿因地域之名物酌軍師之憲令舉而敘之云公諱孝忠字孝忠其先燕人八代祖奇北齊右北平太守封右北平王齊季喪亂寔開邊隙代有長技軼於外區曾王父靖乙失活部落節度使王父遜部落刺史父謚早襲先職來朝上京星環北極輸君長之贊幣鵬變南溟發邊關之導譯拜開府儀同三司他日以公之勤累贈至戶部尚書公雄姿正志沈毅英達傳兵符於百勝襲王爵於九代年未弱冠入侍明庭才爲異倫射必命中以日磬之信愛受秦仲之車服自他有耀至是來歸時元宗御天下四十餘載習

文事而去武備人不知戰恬於已然幽陵首禍穀洛恇駭  
公跡染汙俗心堅本朝豈求生以害仁將蹈難以明義史  
羯繼亂猶居劫中質其所恃無路自奮聞道旁午密陳嘉  
猷俄而成德軍節度李寶臣錫姓撫封同信臣之任就義  
若渴推心於公綜其都軍以壯支郡乃策崇勳累居大官  
凡軍師之禁令攻守之奇正成德之重必咨於公鄰帥獨  
鑒皇赫問罪公出自上谷覘於貝邱冠徒六萬將犯中冀  
乘轅外嚮方陣而前公以駟介千數馳急擊采入其阻  
夾攻其堅敵人力屈昏夜引去遷御史中丞封范陽郡王

尋拜易州刺史加太子賓客以軍之輯睦移於郡以郡之  
班制叶於軍文理武毅交修四暢師貞人僉爲列郡表儀  
初公與寶臣感慨於少年之場周旋於多難之際迎導善  
氣切劘良規若驂有靳如熱斯濯異時自代前定於公且  
曰興師之心勲力之冠也俄而寢疾瘖不能言猶以手指  
北瞠然注目旣而惡子阻命陰交匪人因喪以干紀專地  
而圖禍公驟諫不入飛章上陳請以州兵首遏亂略優詔  
拜工部尚書兼御史大夫恒州刺史成德軍節度使一人  
注意四履專征糾合諸侯連收城縣敗之於東鹿走之於

常山以至斬首且無遺策轉兵部尚書易州刺史易定滄  
等州節度觀察使錫軍號曰義武時三分恒陽之地錄功  
有差而羣帥侈心或懷缺望太行而東疆場日駭且有從  
約皆爲假王公居其腹心守正持重玉立於磷緇之際雞  
鳴於風雨之中靜柯勁草在我而已彼朱滔者以燕陷公  
夸大煽結譎張指斥公乃出和門以莅衆援皦日以誓心  
義利之閒死生不惑且曰縣官之所以賦軍宿兵下尺一  
之詔者在排難捍患而已吾徒之所以乘堅驅良佩丈二  
之組者在畢力致命而已碎首塗地吾無悔焉一心事君

四面受敵俄屬京師急變鑾輅時巡時太師西平王以禁  
兵自魏來援於我於是與公決策赴行在所公素約以伯  
仲又申之婚姻分銳師選良將授以赴蹈使居顏行斷金  
之契匪石不轉定山東爲已任坐制羣疑清轂下爲前籌  
行戡大憝赤誠相照血涕交頤西平繇是建大勳立大烈  
而公亦靜深以制動貞厲以代謀使其徒散約而無亡矢  
遺鏃之費者公之功也前此拜尚書左僕射至是同中書  
門下平章事貞元元年就加司空凡受律行師十有一歲  
承寧諸侯減黜不端動有節制人斯愛戴瞻助其供養賻

補其禮喪捐循接禮勞徠安輯輔以正德而不怵於邪濟以守忠而不回於利章灼卓異有初有終其居涼國太夫人憂也手植松檟倚廬於墓感致瑞祉詔旌其門終身之哀加人一等不遺故舊皆以器使戲下多善吏庭中無留事雖古人之威懷無以過焉春秋六十二以七年三月感疾薨於位德宗皇帝不視朝三日冊贈太傅詔郎吏弔祠禮賻有加其後累贈太師易曰貞武追封上谷郡王易之大有曰信以發志禮之中庸曰誠之不可揜惟公推本於是閭然而彰德宇宏大色容厲肅長才經武奇表出倫喬

枝蔓雲以直上雄劍發匣而耀穎始以天寶十載受詔卽  
戎授范陽郡洪源府右果毅破九姓突厥改上黨郡漳源  
府折衝乾元初轉左領軍衛翊府左郎將實鎮飛狐之地  
寶應中拜左武衛大將軍加金印紫綬歷左金吾大將軍  
兼太僕卿殿中監以至於專席賓護剖符建牙載居六官  
乃進左揆燮和鼎鼐平理水土真食大封異姓而王積功  
伐以崇厚履信順而光大壯武之後遠繼公台富平之門  
時推德器豈徒然哉嗣子今司空同中書門下平章事延  
德郡王茂昭以全才休績保大宣力戴翼天子撫征諸侯



常以工部尚書建旗博陵以刑部尚書循方伯之職特詔  
所理郡爲大都督府經歷右僕射司空丞居代官南北軍  
衛爪牙上將同氣分職寵冒一時侯王則銀黃相映子弟  
乃金埒對起流光貽訓其信矣乎二十年延德王以介圭  
四牡來朝京師德宗沃心嘉歎燕喜蕃錫如韓侯申伯故  
事順宗繼明崇德報功及居台宰進掌邦教敦喻還鎮涕  
洟就塗今皇帝以道御天下燭明理本間歲再入覲爲守  
臣龜龍乞留京師以奉朝請堅若金石激以肺肝服勤王  
家丕赫宸睠感念勲節顧懷義方直以鄭武公桓公漢韋

平父子古先懿鑠舉集公門二邦幼艾千夫長百夫長沐浴風烈怵惕慕思是儀古式以永光耀斯不朽之事也拜君命之辱而傳信焉銘曰

天秉日星亦有風霆君用文德亦資武力太師矯矯生我王國時或艱屯師惟壯直大蹇朋來其心不回好謀而成義路乃開博陵上谷地直析木旣夷狡童則理長轂威謀抗勵命賜渥縟回回盜泉皦皦嘉王凡我所履與之豐福士皆賈餘人以仰足琫戈衮章裕此一方追錫弔祠禮優職喪司徒襲慶道叶仁聖三朝戴君皆受四命觀禮煌煌

嘉猷洋洋湛露彤弓威儀有光甘棠蔽芾邵伯所憩緇衣  
改爲鄭國之詩仍代洪烈邦人戴之永言寘懷乃刻斯碑

大唐四鎮北庭行軍兼涇原等州節度度支營田  
等使開府儀同三司檢校尚書右僕射使持節

涇州諸軍事涇州刺史兼御史大夫上柱國南

川郡王劉公紀功碑銘

并序

貞元十有八年秋九月皇帝以安定節制南川郡王昌之  
休勲懿績與邦人臺老之詠歎聲頌詔掌文之臣某論次  
其詞以永金石臣拜手稽首祇若休命於是考侯王之表

稽贊命之書採太常景鐘之義而繫辭曰惟元后聰明齊  
聖以臨於下惟蓋臣厲翼莊誠以奉於上上下下成龢協建  
皇極此南川所以感會神武發揚碩膚公巖然持重爲國  
保障理涇人十五年政成事節師以律成人以富教智若  
著蔡動如風霆內總端揆外崇長伯八旒七章元衮赤舄  
有南仲方城之略有充國劭農之績君使臣臣事君發舒  
震耀事業光大其理然也公姓劉氏彭城人少沈毅尚氣  
節得大易之師貞春秋之武經肇自幼學揣摩感慨天寶  
末年未弱冠從河南節度使張介然東討林胡以勞署易

州遂城府左果毅其後所奉之府則李太尉光弼劉司徒元佐或盡護車賦率先顏行是爲腹心節以金鼓軍之善政無不參焉師之右職無不綜焉遷至開府儀同三司於列卿爲太僕太常於御史府爲中丞大夫厯太子詹事左散騎常侍工部禮部二尚書異姓而王真食其賦凡三益封至二百室初拒史朝義也宋州郡將委以扞城賊鋒持久力屈引去又皆留其戲下劇虜濟以利兵鈎援臨衝環城傅堞公以淮海屏蔽實繫於斯血誠怒髮士氣旁厲周月堅拒援師實來以愜愜之危走婪婪之狄始佐宣武軍

也任當委重往必投艱既定彭城之急旋假濮陽之守主  
忠信以任患難整偏師以立奇功奮其材謀多所剋獲抗  
希烈而壁寧陵也以徒兵三千組甲五萬登陴搏戰且逾  
四旬激眾扶傷竟申九拒於是救淮揚拔大梁或倍道以  
赴晨壓其壘或鼓行而進終覆其巢於此二役也擒翟暉  
虜鄭賁師不留行甲首山積然後窮追急擊至於許昌渠  
魁窘困終以泯滅凡三與虜确而河汴之閒乃平皆公之  
爲而元佐任公之效也故旬歲閒累居大僚貞元三年朝  
廷以五原盛秋式遏侵軼詔公領宣武駟介北出護邊有

逗撓犯令者立斬三百人以徇傳校肅然威讙朔野俄拜  
本軍京西行營節度使雖拊循行師未有分地而車服恩  
禮已如守臣明年遷四鎮北庭行軍兼涇原等州節度使  
度支營田等使涇州刺史是拜居秦之北地漢之回中俗  
修武備而尚氣敢自馬司徒璘段太尉秀實之以威望德  
聲懷寧邊部其後禍拏師老疆場蕭然或依違選愞日闕  
而已昆夷游騎時及我郭西門不啟南敵益蹙公曰兵以  
奇勝亦以嚴終寇不可翫在吾彀中矣於是建長利規遠  
畧程日力興人徒西城平涼開地二百里據彈箏峽之嶮

北城保定深入百餘里扞青石嶺之固凡七城二堡有堅  
甲利刃制彼衝阨絕其驅侵公之封內燿燧滅息昔之甌  
脫今有市列井樹之閒犬雞相聞東諸侯勤王之師得以  
寧宇而又因士之餘勇求地之遺利荷戈而戰擁耒而耕  
出聞三捷之績居盡四支之斂闢彼壻磽麥禾蔽野亦旣  
悅使而皆樂從十二年就加尚書右僕射武功旣成教化  
旣明里閭有豐年亭鄣有吉語其或四方之旅謁急於公  
則耀威於長武納將於歸化皆稟睿畧而奏成功十五年  
條軍市之租上獻天府數至十萬以贍東師銳於爲國遠



慮數言邊事蓄資力修賦輿思欲大舉衝擊收功絕域之外豈徒使朝那陰密緩帶安枕而已哉惟公瓌姿碩量個儻英偉文理武毅冠於羣倫雲蒸風行交感至用志氣申而功業大寵嘉集而名器崇至若勤身惠人勞徠安集遵守條職貫通典彝有行父事君之心有考父益恭之德可以表率發於純誠宜其長保富貴爲時元老昔尹吉甫美宣王任賢使能作江漢烝民之詩惟聖人感人心以和平天下惟賢臣協聖謨以鎮靜方國則皇帝之注意南川之陳力是信是使有嚴有翼敷宣景化浹洽休德不然則被

邊戴白之叟披肺肝排閭闔而胡爲來哉敘武畧所以揚  
天聲美元侯所以流王澤敢附雅頌式昭德音銘曰

天地健順三辰光潤君臣感通一德誠信皇明照燭保合  
休運亮采有邦登昭傑雋帝曰爾昌碩勲洸洸爰自偏師  
幹不庭方席勝無前援陳下梁爾戰則克爾謀則臧公拜  
休命藩宣賦政介圭暢轂撫是安定其猷克壯上協仁聖  
沛然成功執德之柄乃峻壘垣壘垣崇崇乃藝黍稷黍稷  
芄芄出有銳師入爲良農保就滋殖時公之功武經輯矣  
文事亦理十有五年肅清邊鄙宜登介祉永錫遐紀告類

納忠以毗天子皤皤涇人俯僂上陳肅肅王命命茲下臣  
采獲誠詞章明異倫鏤此貞石輝光日新